

Ko Ha Ipu Vai Mafana



Fai 'e Minjung Park
(Makatu'unga 'i ha talanoa mo'oni)



Na'e fu'u momoko e vai
'i he fai'anga papitaisó.
Fakafokifā kuo ma'u 'e
Miniseni ha fo'i fakakaukau.

Na'e fakavavevave 'a Miniseni mo 'ene Tetí ki he falelotu 'o e Siasí, lolotonga e puhi e havili momokó 'i hona tu'á. Na'e momoko foki mo loto falé. Na'e fakamu 'a Miniseni 'e māfana ange 'i he tokolahia mai 'a e kakaí.

Na'e amanaki ke papitaiso he 'ahó ni e kaungāme'a 'o Miniseni ko Sengimini. Na'e fetaulaki 'a Sengimini mo e ongo faifekau sisitaá pea na'e fuoloa pē 'ene fakakaukau ke papitaisó. Na'e aukai mo lotua ia 'e he kotoa e uotí. Ne faifai peá ne fili ke papitaiso. Pea ko e 'ahó 'eni!

Na'e kei fakafonu 'a e vai papitaisó 'i he hū atu 'a Miniseni mo 'ene Tetí ki he lokí. Na'á na tangutu he tafa'aki 'o e kaungāme'a 'o Miniseni ko Sēmisi. Ne 'ikai fuoloa pea hū mai 'a Sengimini, kuó ne tui vala papitaiso hinehina.

Na'e pehē ange 'e Sēmisi, "Okú ne mata'i tailiili."

Na'e kamo pē 'a Miniseni. Na'á ne fiefia 'i he'ene lava ke 'i ai ke poupu ki hono kaungāme'á.

Ne 'ikai fuoloa kuo fonu e vai papitaisó. Na'e hokosia e taimi ke kamata e papitaisó! Ka na'e talanoa e ongo faifekau mo ha kāingalotu 'e ni'ihii pea nau fofonga hoha'a, kae 'ikai kamata e papitaisó. Na'e 'alu 'a Teti ke vakai pe ko e hā e me'a na'e hokó.

"Ko e hā e me'a 'oku hokó?" Ko e fehu'i ia 'a Miniseni kia Tetí.

Na'e talaange 'e Teti, "Oku maumau 'a e misini fakamāfana vai pea 'oku momoko 'aupito e vai papitaisó."

Na'e sio 'a Miniseni ki he vai papitaisó. 'I he taimi na'á ne papitaiso aí, na'e māfana e 'eá, māfana e vaí, pea māfana e fā'ofua ange 'ene tetí ki te ia 'i he'ene 'alu hake mei he vaí. Na'e 'ikai ke ne lava 'o fakakaukau ki ha'ane papitaiso 'i he vai momokó 'i ha 'aho momoko pehē he fa'ahita'u momokó.

Na'e mamata 'a Miniseni ki he hifo loto-to'a 'a Sengimini ki he loto vaí mo 'Eletā Kekí, 'a ia te ne fai e papitaisó.

"Oku fu'u momoko!" Ko e lea ia 'a Sengimini. "He 'ikai ke u lava 'o nofo fuoloa heni." Na'á ne kaka ki tu'a mei he vai papitaisó mo e teteteté. Na'e ongo'i fakafā'ia 'a Miniseni 'iate ia.

Hili ha ngaahi miniti si'i mei ai, na'e toe feinga 'a Sengimini ke hifo ki he vaí. Ko e taimi ko 'ení na'á ne ki'i fo'i manga pē 'e fiha peá ne toe fakavave ki tu'a. Na'á ne toe feinga tu'o ua. Na'e moko'i 'a e vaí! "E lava 'o tuku ā?" Ko e kole ange ia 'a Sengimini. Ne hangē na'á ne meimei tangí.

Na'e lotu fakalongolongo 'a Miniseni 'o fehu'i e founa te ne lava ai 'o tokoní.

Na'e pehē 'e ha tokotaha, "Ko e hā 'oku totonu ke tau faí?"

TA FAKATAATAI E MIKE BLAKE

Na'e fehu'i hake 'e ha tokotaha kehe, "Oku totonu nai ke tau toloi e papitaisó?" Na'e fie tokoni e tokotaha kotoa kia Sengimini ka na'e 'ikai ke nau 'ilo'i pē 'e founa fēfē.

Fakafokifā kuo ma'u 'e Miniseni ha fo'i fakakaukau. Na'á ne kamosi 'a Sēmisi. "Sēmisi, ta 'alu!"

Na'e 'alu 'a Miniseni mo Sēmisi ki peito. Na'á na ma'u ha ipu mo e poulu lahi pea fakafonu 'aki e vai vela mei he 'utu'anga vaí. Na'á na to'o fakalelei ia ki he falelotu pea hua'i e vai velá ki he loto vai papitaisó. "Mahalo 'e tokoni 'eni ke fakamāfana'i e vaí!" Ko e lea ia 'a Miniseni.

Na'e 'ohovale e tokotaha kotoa. Na'e pehē 'e ha tokotaha, "Ko e hā na'e 'ikai ke tau fakakaukau ai ki ai?"

Na'e kau fakataha leva e tokotaha kotoa ke kamata 'utu mai e vai mafana mei peito. Na'e fakalili 'e he kakai 'e ni'ihii 'a e vaí 'i he sitoú. Na'e hiki fakalelei 'e he ni'ihii e 'ū kuló 'i he holó pea hua'i e vai velá ki he vai papitaisó. Na'e a'u ki he toenga e fānau Palaimelí na'á nau tokoni 'i he fetuku tahataha mai e ipú.



Ne faifai pea māfana lelei 'a e vaí. Na'e hifo atu 'a Sengimini mo 'Eletā Kekí ki he loto vai papitaisó. Na'e ongo'i loto-māfana 'a Miniseni 'i he'ene fanongo ki hono lea 'aki 'e 'Eletā Kekí 'a e fakalea 'o e lotu papitaisó. 'I he taimi na'e tu'u hake ai 'a Sengimini mei he vaí, na'á ne malimali. Na'e fiefia 'a e tokotaha kotoa.

Hili e fetongi 'a Sengimini ki hono vala mātu'ú, na'e fā'ofua 'a Miniseni ki te ia. Na'e 'ilo'i 'e Miniseni ko e taimi pē na'á ne lotu loto-to'a aí, na'e tokoni 'i ia 'e he Tamai Hēvaní ke ne 'ilo'i e me'a ke faí. Ko ha papitaiso 'eni 'e taha he 'ikai teitei ngalo 'ia Miniseni! ●

'Oku nofo e taha na'á ne fa'á 'i Soulu, Kōlea Tonga.

Ko Sengimini mo e kau faifekau mo e kakai 'e ni'ihii na'e tokoni 'i he 'utu vaí.